

EDITORIAL

Natikagrabe nga krisis, natikapintas nga pag-ato

Yana nga 2022, angay lauman han katawhan Pilipino nga matikagrabe pa an kakurian ngan krisis nga ira gin-aantos yana. Ha luyo nga gapil, an sugad hini nga krisis amo liwat an sungo nga nagpapalarab ha ira kinabuhi-ngan-kamatayon nga pag-ato ha mga tirano sugad kan Duterte.

Ha tuyo nga makakapyot ha poder, gin-aandam na ni Duterte an iya mga baraha agud limbungon an pam-presidente nga eleksyon. Para hini, ginpadig-on niya an pakig-alyansa ha mga Marcos ngan Arroyo. Ini nga MAD (tuyaw) nga alyansa amo an nakatin ha pulis ngan militar, ha Comelec ngan makinarya ha pag-ihap han botos, ngan ha masobra usa katrilyon kapisos nga kwarta han katawhan nga ira ginkawat samtang nakalingkod ha poder. Amo ini an ira mga instrumento para ha waray kapareho nga panhugay, pandarahug, intimidasyon ngan mahugaw nga pagkampanya ha tiarabot nga mga bulan tubtub ha eleksyon.

Kundi mayda gihapon sumpakiay bisan ha sakob han alyansa nga MAD. Kada usa ha ira karuyag magin mas poderoso ngan mahakin an mas dako

nga karikuhan. Bisan kun hi Duterte an aada ha poder yana, hi Marcos, amo an pinakakwartahan sanglit hiya an pinakadominante ha ira. Sanglit aada gihapon an posibilidad nga diri igdayon ni Duterte an eleksyon (*no elections* o "no-el") ngan magdeklara hiya hin butad nga balaud militar.

Diri pa mahuhuman kundi matikagrabe pa an pandemya nga Covid-19. Tungod kay mahinay ngan haligot an pagpabakuna, ngan waray *mass testing*, episyente nga *contact tracing* ngan pagkwarentina, magpapadayon gihapon an pagsamwak han bayrus. Madedebelop gihap an mga mas mapintas nga baryant ngan utro nga mapupuno an mga ospital, mauura-urahan an mga trabahador pankalibugan, magkukulang an mga medisina ngan panmedikal nga suplay, ngan magdadamo an matatapanan

"Natikapintas..." sundan ha paypay 2

16 nga kaswalti han AFP-PNP ha mga opensiba han BHB

DIRI MAMENOS HA 16 an kaswalti ha ranggo han mga pasista nga tropa han 20th Infantry Battalion ngan Philippine National Police-Special Action Force (PNP-SAF) ha mga taktikal nga opensiba nga iginlansar han Bagong Hukbong Bayan ha isla han Samar tikang Nobyembre 25 tubtub Disyembre 21, 2021.

Disyembre 15. Unom an patay ngan lima an samaran kahuman ambuson han BHB-Arnulfo Ortiz Command (BHB-AOC) an mga tropa han PNP-SAF ngan mga kaapi han paramilitar nga grupo nga "Dos" ha Barangay Del Rosario, Matuguinao, Western Samar dapit alas-8 han aga. An "Dos," usa nga kontra-rebolusyunaryo nga paramilitar nga grupo han militarista nga meyor han Matuguinao nga hi Aran Boller. Kakunsabo hira han mga pasista nga tropa ha ekstrahudisyal nga panmatay ngan iba pa nga magraut nga binuhatan ha masa ha erya.

Disyembre 21. Tulo kabeses nga naglansar hin operasyon isnayp an BHB-Rodante Urtal Command (RUC) ha Barangay Victory ngan Macarthur, Las Navas ngan Barangay Hiyaot, Silvino Lobos, Northern Samar. Duha an kumpirmado nga patay ha mga nag-operasyon nga tropa ha erya.

Disyembre 20. Samaran an usa nga membro han PNP-SAF kahuman

"16 nga kaswalti..." sundan ha paypay 2

PKP@53: Pakyason an brutal nga kontra-rebolusyunaryo nga gerra han US-Duterte!

Ha ika-53 nga anibersaryo han Partido Komunista ng Pilipinas (PKP) hadin Disyembre 26, nanawagan an Komite Sentral (KS) ha ngatanan nga rebolusyunaryo nga pwersa ngan ha katawhan Pilipino nga pakyason an brutal nga kontra-rebolusyunaryo nga gerra han rehimen US-Duterte, ngan ungbawan an ngatanan nga ulang agud ipasulong an demokratiko nga rebolusyon han katawhan.

Sigon ha KS, aada ha paborable nga kondisyon an bug-os nga kalibutan para ha pagpukaw, pag-organisa ngan pagpagios ha katawhan ngan paglansar hin mga panmasa nga pakigbisog ngan armado nga pag-ato.


"Nag-aanak hin natikapintas nga sumpakiay ngan pag-ato an natikahilarum nga imperyalista nga krisis, samtang nag-aanak hin dugang nga pag-ato an natikagrabe nga krisis ha ilarum han rehimen US-Duterte," sering hini.

Hini liwat nga adlaw, nagpagawas hin pahayag an PKP-Eastern Visayas nga "pag-usahon ngan pamunuan an masa ha mabayanihon nga pakigbisog agud ihimulag ngan tapuson an pasista nga terorista nga rehimen US-Duterte."

Sering hini, naluludlod an rehiyon ha natikahilarum nga bagapyudal ngan bagakolonyal nga krisis, natikagrabe nga neoliberal nga atake, pag-ungbaw han balaud militar ha kabaryuhan, ngan waray kapareho nga pasista nga terorismo ilarum han rehimen Duterte.

Ha luyo hini, "pukaw an mga rebolusyunaryo nga pwersa ha Eastern Visayas ha presente nga sitwasyon ngan ha sugad, optimistiko nga akos nira pag-usahon an masa, ungbawan an ira mga internal nga kaluyahan, ngan determinado nga pabagsakon an rehimen US-Duterte ngan maghimo hin mga pag-abante ha gerra han katawhan," sigon ha PKP-EV.

Para ha kumpleto nga bersyon han pahayag han PKP-KS, basahon ini ha Disyembre 26 nga ispesyal nga isyu han *Ang Bayan*. Mababasa naman an bug-os nga pahayag han PKP-EV ha ispesyal nga isyu han *Larab*. ■



"16 nga kaswalti..." tikang ha paypay 1

isnaypon han BHB-RUC ha Barangay San Jose (Hebobollao) ha Catubig, Northern Samar.

Nobyembre 28. Duha an patay ngan usa an samaran ha PNP-SAF kahuman isnaypon han BHB-RUC ha

Barangay C.M. Recto (Lobedico), Catubig dapit alas-5:30 han aga.

Nobyembre 25. Ginharas han BHB-RUC an detatsment han 20th IB ha Barangay Rumbang, Laoang, Northern Samar dapit alas-5 han aga. ■

"Natikapintas..." tikang ha paypay 1

ngan mamamatay.

Gagamiton nga pasangilan an pandemya agud pahugton an mga lockdown ngan restriksyon ha paggios. Sugad hadto, matikagrabe an pangabuso, pan-gigipit ngan pwersahay nga pagpabakuna, labina na gud ha mga diri bakunado. Ginmando na ni Duterte nga arestuhon an mga waray makagpabakuna nga magawas han ira mga balay, bisan kun talapas ini ha tawhanon nga katungod.

Sisingabuton ni Duterte an pandemya agud iligis an mga ligal nga proseso ngan iratsada an mga mas pakuri ngan mapan-gipit nga pali-siya. Hadto, nahimo niya nga igpaseran an ABS-CBN, igsabalaud an Anti-Terror Law, pabuyuhon an pagmimina, pangalsada, panlupot hin tuna ngan importasyon han mga agrikultural nga produkto, raysa-ngon an himubo nga suhol han mga trabahador ngan pahiluagon an kurapsyon. Gintagan niya hin mas dako nga poder an pulis ngan militar ngan ginhugayan hira hin dagko nga sweldo ngan mga bag-o nga pan-gerra nga uyanan agud gamiton ha panmuypoy ha katawhan.

Diri na mailob han katawhan an mas grabe pa nga paghimakuri ilarum ni Duterte. Nasusumo na gud hira ngan grabe nga nangangalas. An mas grabe nga krisis ngan pangigipit amo an nagpupukaw ha ira nga tugbangan ini hin mas makusog nga pag-ato. An dedlayn ni Duterte nga rumkon an rebolusyunaryo nga kagiusan ha Hunyo sigurado nga mapapakyas. Kinahanglan singabuton an presente nga kamutangan agud dugang nga papintason an mga panmasa nga pakigbisog ngan an armado nga pakig-away agud tapuson an tiraniya ni Duterte.

Yana nga tuig, paaningalon an guliat han katawhan: Duterte, sukton! Duterte, papagbaydon! Duterte, patalsikon! ■

Terorista nga pamasko han 20th IB ha Northern Samar

Terrorista nga panganyon an nagin pamasko han 20th Infantry Battalion ha pamumuno ni Lt. Col. Jomar Buban ha mga residente han pira nga barangay ha Northern Samar ha okasyon han anibersaryo han Partido Komunista ng Pilipinas (PKP) hadin Disyembre 26.

Dapit ala-1:30 han kaagahon, samtang nakaturug pa an mga tawo, ginbuhian han 20th IB an upat nga bala han 105mm *howitzer* tikang ha hedkwarters hini ha San Jorge ngadto ha mga umhanan ha Catubig-Las Navas. Ginringgal hini an mga residente han San Miguel, Hinagonoyan, Osang, Nagoocan ngan iba pa nga kasapit nga baryo.

Amo ini an pinakaurhi ha tulo nga terorista nga pangatake tikang ha kahanginan nga ginhimo han AFP ha lugar tikang hadin Septyembre 16. Syahan ini nga nanmomba ngan nangistraping tikang ha kahanginan maagahon hiton nga adlaw ngan hin waray klaro nga target. Hadin Nobyembre, upat kabeses liwat ini nagpabuto hin 105mm *howitzer* ngadto hirani ha San Miguel kahuman harason han BHB an mga elemento han 20th IB, diin duha nga sundalo an napatay ngan pira pa an nasamaran.

Waray man nahitabo nga engkwentro giutan han BHB ngan AFP antes an terorista nga panganyon hadton Disyembre 26. “Tuyo hini nga pag-atake diri la an makaigo han yunit han BHB, kundi magsabrag hin ngirhat ha masa nga parag-uma ha okasyon han anibersaryo han PKP,” pahayag han NDF-EV kasumpay hini nga pag-atake.

Ginsundan an terorista nga panganyon hin usa nga “peace rally” ha San Miguel. Ginpirit han mga sundalo an mga lokal nga upisyal nga seguruhon nga damo nga molupyo an matambong ha ira hinimu-himo nga rali. Pira kabeses hira nagpabandilyo ha baryo ngan ginsidngan an mga residente nga diri madadayon an aktibidad kun kulang an tawo, samtang diri

ginpapahibaro ha ira kun ano gud an ira tuyo.

Ha aktwal nga katitirok, tumambong an mga benepisyaryo han 4Ps ngan iba pa nga programa han guberno para ha pinansyal nga ayuda, ngan mga lokal nga upisyal. Ginpakatinan an mga inosente nga tawo hin mga gidaan na ginhimo nga mga plakard nga mayda nakasurat nga mga pagpakaraot ha rebolusyunaryo nga kagiusan, ngan ginpalibot ha baryo. Ginhimo liwat an pareho nga mga “peace rally” ha pira pa nga barangay ha magkalain-lain nga parte han Samar.

Madarahug an mga taktika han AFP agud pakarauton an anibersaryo han PKP, nga ha aktwal, usa nga ispesyal nga okasyon para ha masa ngan maiha nira ginhuhulat ngan marayhak nga gin-aatendaran. Diri ini sugad han mga buwa nga “peace rally” han AFP, diin panmirit ngan panlibo an ira pamaagi agud patambungon an katawhan.


“Benepisyaryo” han terorismo han estado

An magkaraknit nga baryo han San Miguel, Osang ngan Nagoocan nga gintarget han AFP han terorista nga pangatake, amo liwat an mga barangay nga “benepisyaryo” han Support to Barangay Development Program (SBDP), o an mapan-uwat ngan mapanhugay nga “P20 kamilyon” nga programa han NTF-Elcac. Bisan kun gindeklara na nga “malimpyo” ha impluwensiya han hukbo han katawhan, waray

hunong gihapon an panarhug, pangigipit, ngan pagkakampo hini nga mga baryo.

Tikang hadin Nobyembre, dirudiretso an mga saywar nga programa nga kontra-insurhensiya ha San Miguel. Labot ha mga programa kasumpay han SBDP, binalay-balay nga paginterogar ngan pamugos ha mga lokal nga upisyal, nagkakampo liwat an mga sundalo ha *health center* ngan *day care center*. Reklamo han mga residente, diri na nira mahigamitan an ira mga pasilidad ngan talapas ini ha balaud nga nagdidiri ha pagkampo ha mga komunidad han sibilyan. Gintutukod liwat han militar an mga buwa nga organisasyon han parag-uma, kababayin-an, ngan kabatan-unan ha tuyo nga bungkagon an pagkaurusa han mga taghimaryo.

Ha Osang, ginpugos an mga upisyal han barangay hadin Disyembre nga magpagawas hin resolusyon nga natugot ha mga sundalo nga magkampo ha sulod han baryo ngan nag-aangkon hin responsabilidad kun mayda mahitabo ha ira. Ginpirit liwat hira ngan an mga batan-on nga igpasilitar an suplay han mga tropa. “Nagesensus” ngan nagpapalaba liwat ini ha mga residente. ■



Kontrapyudal nga kampanya, kadaugan han kablas nga parag-uma

Ha luyo han grabe nga pan-ekonomiko nga krisis, abat han damo nga pamilya ha kabaryuhan han norte-este han Samar an ira mga kadaugan ha kontrapyudal nga pakig-away (KPP) ngan mga panmasa nga kampanya.

"Dako nga bulig an KPP labina yana nga Pasko ngan Año Nuevo," sering ni Karding, 55.

Sobra usa na katuig tikang han maidaug nira an KPP nga pagpahimubo han presyo han baktin ha ira baryo nga aada nala yana ha ₱170 kada kilo han lalaki nga baktin ngan ₱150 naman kada kilo kun babayi nga nanganak na.

Dako an ira tipid ha pagdaug hini nga kampanya. Kun mapalit hin baktin ha bungto, maabot na ha ₱280 kada kilo an baligya yana, labot pa ha pasahe ngan panahon nga ig-aalutaga pagpalit hini.

Ha usa naman nga klaster, napa-himubo an presyo han batakan nga papliton kahuman nira makab-ot ha negosasyon nga tubtub 10% la an patubo ha mga negosyante. Mahugot gihapon an pagmonitor ha kaeksakto han sukol han mga taraksan agud mapugngan an bisan ano nga porma hin panlimbong.

Nakumbinser an mga negosyante nga igpatuman an ginkaurusahan ha asembliya ha baryo nga igpabor an presyo ha mayoriya nga kablas nga parag-uma. Bisan kun naibanan an ira kita, tungod kay nagin barato, mas nagin masurong man an ira negosyo.

Iginreport naman han lokal nga mantalaan nga *Bandilyo Gerilya* nga naidaug gihapon han mga parag-uma an pagpahitaas han suhol han pagtanum ha erya. Tikang ha ₱100 kada korteyo, aada na ini ha ₱120 labot pa ha pakaon ha trabahador ha uma.

Ginpapadisan ini nga mga pakigbisog han kolektibo nga paningkamot o tiriklos. Ha usa nga klaster, mayda kampanya ha pagtanum han humay, дума, utanon, ngan iba pa nga produkto. Nag-aragmot hira ha pagpalit hin mga gahi ngan burublig hira ha pagtanum hini. Ginpapaningkamutan gihapon nira an utro nga pagbuhi han ira kooperatiba agud maibaligya ha hiruhitaas nga presyo an ira lukad

ngan makapalit hin barubarato nga bugas.

Hugot an sumpayan han masa ngan hukbo han katawhan ha pag-atubang ha pandemya. Nagtututdo an kada platun han BHB hin paghimo hin lagundi *syrup* para ha ubo ngan *virgin coconut oil* agud mapakusog an resistensya kontra ha Covid-19, samtang padayon an kampanya ha kalimpyuhan ha mga baryo. Nahatag gihapon hira hin iba nga serbisyo sugad han akupangtura, pagtsek-ap, *dental* nga serbisyo ngan *minor surgery*.

"Mayda paglaum kun magkaurusa," sering pa man ni Karding.

Napamatud-an hini nga mga erya nga ha atubangan han wala-tuo nga paghinitaas han presyo han batakan nga papliton ngan iba pa nga kakurian ha butnga han krisis, yawe an makaklase nga pakigbisog ngan agraryo nga rebolusyon, burubligay, ngan hugot nga sumpay han masa ngan kasama agud atubangon an mga panmaihaan ngan kadagmitan nga panginahanglan han masa, malapayan an mga ulang, ngan mapanalipdan an ira mga kadaugan. ■

HA KAMATUORAN

₱112,000

an gin-gastos han AFP, ha balor nga ₱28,000 kada bala, ha **paturapak nga panganyon** hini hadton **Disyembre 26** agud magsabrag hin ngirhat ha kabaryuhan han Catubig-Las Navas. Katugbang ini han



56,000 KASAKO HIN BUGAS

kun diin makakagbenepisyo unta an **56,000 nga pamilya.**

Taramdan: *Bandilyo Gerilya*, Rebolusyunaryo nga Panmasa nga Mantalaan san Norte Sinirangan san Samar